



戀戀故鄉情（北四縣腔）

一個毋係當出名个所在——獅潭，就係吾个故鄉。因為係明德水庫个水源區，故所禁建，到今完全無受著污染，山靚、水清，做得講係保持鄉村原貌个好地方。到底獅潭有麼个值得大家去遠寮呢？在這定定仔摻大家紹介。

獅潭南北長大約有三十三公里，兩片都係山，中央有一條河壩。山頂種盡多个就係桂竹，另外還有年柑、仙草，盡有名个係仙山。在新店去仙山个路脣頂，種當多个櫻花，在逐年二、三月櫻花開到榮榮，滿山紅色个花海，加上仙山海拔九百零米，濛紗煙陣陣飄來，看過去如夢似幻，就像仙境樣仔。仙山有一個宮廟——靈洞宮，供奉玉皇大帝摻恩祖公（關公）。廟坪頂係好天，看仔著苗栗个全景，連臺灣海峽也看得著。有成時看濛紗煙摻雲海，企等看山嵐變化，心頭活活開，加上一陣陣涼風吹過來，一下仔就毋記得所有个煩惱。時間許可留在廟頂歇一暗晷，看日頭落山。第二日打早看日出，萬道金光，自家就會有一種摻土地結合个感動，人世間還有麼个較值得懷念个？

在廟坪蹶上仙水亭，主要係摻仙水。相傳仙水係頭擺有當地人發病仔，哪就醫毋好。有一日無意中蹶到山頂看著山泉水，飲了以後試著盡好食，就摻轉屋下欸，所有个病痛毋使食藥仔就好咧，就恁仰一傳十、十傳百。仙水亭个仙水就變到大家去仙山定著愛帶轉去个等路。仙水會有效可能係山泉水肚有當多礦物質摻微量元素，分人欸了以後堵好醫好厥症頭，正會恁出名。

在一個山城，會分人試著好奈係保留大自然个原貌。這位个河壩水清見底，河壩肚有當多魚仔。毋過頭擺有人毒魚仔、電魚仔，使著河壩肚魚仔伸無幾多尾。好得當地人覺醒，開始做護河護魚个行動。漸漸仔河壩肚个魚仔緊來緊多咧！比論講白哥仔、石斑仔、狗鯰仔、蝦公、湖鰱仔摻鯽魚仔等，看魚仔洄上洄下盡生趣。衰過个毛蟹、鱸鰻就當少看著仔，在大東勢有一間淡水魚博物館，做得在水族箱看河壩肚魚仔个生態，順續做得食客家美食！

講著食，走到毛辮直。客家菜分人印象就係鹹、肥、香。因為客家人愛耕種，愛食飽兜仔正有力好做事。現下講究養生，客家菜也改進毋好高油、高塩、高糖，食較淡兜仔。傳統个四炆、四炒就係客家人省儉做出來好食个料理。四炆就係將焯豬肉、雞鴨个肥湯，拿來炆蘿蔔仔、炆筍乾、炆長年菜、炆豆干；四炒係豬腸炒薑絲、炒肉、炒鹹酸甜、炒下水。一滴仔就毋打爽，再加上剝雞盤搵桔醬、煲爌肉，好食到舌嫻就會吞落去，大家定著

會尋尾。仙草係當地有名个特產，頭家用料實在，除忒食燒、食冷以外，還有炸仙草膠仙草水餃、仙草麵。仙草清涼退火，係天然个食物，當多人會買轉去做等路送分親朋好友。當然還有客家米食，菜包、發粿、米篩目也盡人食。

汶水街項發展客家文化創意產業，當地人利用禾稈編織成一茶壽，隨時愛食就毋會冷淡泠仔，還像正煮好共樣，符合這下節能、減碳个風潮。另外豬膽肝也盡出名，毋過係試著有忒鹹兜仔，莫食恁多豬膽肝較好。當然附近个刺泡仔草莓，還當選臺灣十大果子个第一名。鮮紅个刺泡仔有致命个吸引力，酸酸甜甜个味緒比戀愛較甜蜜。

五月雪油桐花，本來在山林壁角，大家就毋記得咧。相傳日治時代，日本人愛做高級个家具，愛用著梧桐。毋過梧桐當難大，就有人摺梧桐盡相像个油桐拿來騙日本人。因爭油桐好種又遽大，盡像梧桐，故所有兜人就lien⁵⁵日本人，油桐准梧桐賣日本人，落尾分日本人捉包，不單只油桐連梧桐就毋會買咧！就恁樣滿哪仔就係油桐。好得五、六年前行政院客委會發展客家創意文化產業一桐花祭，錫來當多个觀光人潮，一年有幾下億銀个收入，桐花祭時節，客家莊鬧熱煎煎，人尖人。雪白个油桐花，風一吹就叭叭跌，就像落雪共樣，有講毋出个靚，情侶行在桐花步道項，感情增溫係必然个。在獅潭北窩去頭屋三湖个鳴鳳古道，係欣賞油桐花个盡好景點，一路項聽鳥仔唱歌、蟲仔叫，大自然个美景分人試著無白行一轉。

在錫隘去公館北河暗影，本來係一條羊腸小徑，愛蹶七十二段，正會到茄苳樹下，大概愛行二點零鐘，一身汗流脈落，也吸收樹林度新鮮个空氣摺芬多精。茄苳樹有幾百年歷史咧，樹身砸礮，生機盎然。到山頂高樹頭下，就會深深感受「前人種樹後人涼」。這下有開一條大路，本來獅潭到公館愛五十分鐘，因爭這條路做得省三十分鐘，大約二十分鐘就到公館。歸路仔種櫻花，愛記得逐年二、三月仔來這位看櫻花，毋會輸陽明山喔！

火焰蟲、唧唧蟲，楊梅樹下吊燈籠。燈籠光照四方，燈籠暗跌落埃。埃下一枚針，拈來繡觀音。觀音面前一頭禾，割著一擔又一籬。分得你來佢又無。暗晡頭在獅潭火焰蟲飛上又飛下，都市來个細人仔會有講毋出个驚喜。火焰蟲摺貓頭鳥共樣係環境生態指標，愛淨俐个所在正會有火焰蟲摺貓頭鳥。暗晡頭去樹林肚看貓頭鳥，用手電筒照樹頂，兩粒像鑽石个就係貓頭鳥个目珠。獅潭貓頭鳥有二十零種，係臺灣數量種類盡多个。貓頭鳥恬恬企在樹頂，實在當得人惜。

在獅潭有一個農場種桑樹，畜蠶仔，做蠶絲被。農場主人頭腦盡好，佢發明平面繭，毋像傳統繭會分蠶仔屙屎。厥蠶絲無污染，做出來个蠶絲被又軟又燒又好蓋。蠶絲被還做得現場DIY，大人細仔做得學擲蠶絲做被骨。現場做好帶轉屋下去，毋會買著黑心蠶絲被。聽講蠶絲係天然纖維，對人體康健當有好處。桑椹富含維他命C，到這位做得食兜桑椹、果汁甚至桑椹酒，有機養生對身體有好無壞。

親不親，故鄉人，美不美，故鄉水。故鄉係佢魂牽夢縈，毋會毋記得个所在。建議春天去獅潭，摘年柑、刺泡仔。清明邊仔去拗桂竹筍，宋朝蘇東坡講：「寧可食無肉，不可居無竹。毋肉令人瘦，無竹令人俗。」還記得電影臥虎藏龍竹林肚个決鬥無？竹仔代表高風亮節，梅蘭菊竹，竹仔摺人盡接近，除忒做家具，竹筍過較係盡好个食材，無農藥，富含纖維質，輒輒食就不會熱結。熱天到獅潭看滿天星斗、火焰蟲，無光害也共下看貓頭鳥，去河壩捉蝦公，聽草唧仔、蜗仔叫，係無係當有意思！其實單淨在獅潭無污染个空氣就有價值咧！

離鄉不離腔，客家人愛積極勇敢使用客家話。客人毋講客家話，阿公婆會跣起來罵。有人講閩南話已經掛號看門診，客話已經戴院吊大笏射，原住民語核加護病房咧！語言係會死亡个，客語愛客人自己救。「寧賣祖宗田，莫忘祖宗言。寧賣祖宗坑，莫忘祖宗聲。」正毋會淪落到口號定定。只有恁樣，客話傳承下去，恩俚正毋會成為千古罪人。

創作理念

人不親土親，不管將來遷徙到哪位？「胞衣跡」就係偃出世个所在。故鄉个一草一木，人情風土離開越久，印象越鮮明。這係一種無法割捨个感情。這下環境污染嚴重，愛尋一個像獅潭恁淨利个所在，當無簡單。喊醒大家愛鄉愛土，留一片淨土分後代子孫。毋好害子害孫，做千古罪人。

謝銘鴻

北新國小客語教師

